



2 Mi por lesa

Na warda di polis

'Boso ta ban ku mi?' tata ta puntra Kimi i Rudi.

'Mi tin ku bai hasi algun rospondi i despues mi tin un sorpresa pa boso.'

'Ye,' Kimi i Rudi ta grita i mesora nan ta bula den outo.

Promé tata ta kore bai panaderia.

Despues nan ta bai un libreria.

Kimi ta haña un buki di chiste i

Rudi ta haña un buki di aventura.

'Unda nos ta bai awor, tata?' Kimi ta puntra ora nan ta sintá den outo atrobe.

'Nos ta bai warda di polis den nos bario,' tata ta kontestá.

Spantá Kimi i Rudi ta wak otro.

Ta kiko nan ta bai hasi na warda di polis?

'Sigur tata sa ku nos a kue mangel den kashi sin pidi,' Kimi ta bisa pokopoko den Rudi su orea.

'Pero tata ku mama tabata drumi,'

Rudi ta respondé. 'Nos no por a lanta nan.

Bo ta kere nos mester bai prison?'

'Mi no sa,' Kimi ta kontestá i su lep ta kuminsá tembla.

'Ya, nos a yega kaba,' tata ta bisa miéntras e ta parker e outo bou di un palu altu na warda di polis.

Pokopoko Kimi i Rudi ta baha for di outo. Kabes abou nan ta kana bai paden.

'Muchanan, bai sinta un ratu riba e banki ei,' tata ta bisa. 'Mi ta bini bèk un djis.'

Kimi ta bai sinta banda di Rudi.

Nan ta tene otro su man.

Spantá nan ta wak rònt.

Na e murayanan nan ta mira poster

ku potrèt di algun bandido.

Un polis ta drenta warda.

Den su man e tin un klòp.

E buinan na su faha ta bai bin

miéntras e kana.

Kimi ta tene Rudi su man mas duru ainda.

Di ripiente un porta ta habri i tata ta salí ku un otro polis.

'Ya, muchanan,' tata ta bisa.

'Nos ta asina leu. Boso ta ban?'

'Nò,' Kimi ta yora. 'Mi no ke bai prison.'

'Mi tampoko,' Rudi tambe ta snek.

'Bai prison?' tata i e polis ta bisa

strañá. 'Ta ken di ku boso mester

bai prison?

Mucha chikitu no sa bai prison i

ademas boso ta bon mucha.

Ta un sorpresa nos tin pa boso.

Huntu nos ta bai kore un rònchi den bario den outo di polis.



T'esei boso ta ke semper, tòg?'

Ku wowo grandi Kimi i Rudi ta wak otro. Lihé nan ta seka nan lágrima.

Pokopoko un sonrisa ta bini riba nan kara.

'Ye,' nan ta grita, 'nos ta bai keiru den outo di polis.'

'Mener polis ta sende e sirena tambe?' Rudi ta puntra.

'Podisé,' e polis ta bisa ku un kara harí.

Kimi i Rudi no ta pèrdè pa gana i mesora nan ta kore bai pafó tras di tata i shon polis.

3 Bo a komprendé?

- Promé bo yùfrou òf mener ta lesa e kuenta.
- Despues abo ta les'é.
- Bo a komprendé e kuenta?

Pregunta

1. Kiko tata ta puntra Kimi i Rudi?
2. Unda nan ta bai promé?
3. Kiko e muchanan ta haña di regalo di tata?
4. Dikon Kimi ku Rudi ta wak otro spantá ora tata bisa ku nan ta bai warda di polis?
5. Dikon e muchanan no a pidi mama ku tata un mangel?
6. Kiko Kimi i Rudi ta kere?
7. Kiko nan ta wak na muraya den warda di polis?
8. Dikon Kimi i Rudi tin miedo di bai ku tata i e polis?
9. Ta kiko e sorpresa di tata ta?
10. Kiko Rudi ke pa e polis hasi?
11. Kimi i Rudi a gusta e sorpresa.
Na kiko bo por ripará esei?

